

Euskal Herriko Ahotsak
ahotsak.com

Joxepatxo Artola Zuloaga

*Lezo, Gipuzkoa
(1932-2018)*

Aurkibidea



Biografia



Lezoko Kale Nagusian jaio zen Pantxika Txikienea etxean, herrian Ataundarrenekoa bezala ezagutzen zen etxean. Ama Lezoko Gabiria baserrikoa zen; aita, berriz, Erreterian jaioa zen, baina berehala Lezora bizitzera joandakoa familia osoarekin. Aitak Lezoko "Real Asturiana de Minas" egiten zuen lana eta fabrika horretako langileek lantegiaren lurretan baratzea egiteko aukera zuten. Zortzi senide ziren eta Joxepatxo bosgarrena izan zen. Zazpi urterekin hasi eta hamalau urte bete arte joan zen eskolara, gogoan ditu Dolores Lopez maistrak jartzen zizkien zigorrak. Erreteriko Esmalterian egin zuen lan hamabi urtez. Logroñokoa du senarra nahiz urte asko eraman Lezon bizitzen. Pantxika Txikienean bizi ziren senarra eta biak elkarrizketa egin zitzaionean.

Zintak

LEZ-028

- **Proiektua:** Euskal Herriko Ahotsak
- **Elkarrizketatzailea(k):** Zabala, Edurne
- **Data:** 2009-11-11
- **Iraupena:** 63 min
- **Euskarria:** Bideo digitala
- **Kodifikatzailea:** Etxeberria, Eider

Pasarteak

1. Emakumeak nagusi etxean

- **Erref:** LEZ-028/002
- **Iraupena:** 0:01:49. **Hasi:** 00:04:48. **Bukatu:** 00:06:37
- **Multimedia:** bideoa online ikusgai

Gaia(k):

- Familia eta harremanak » Lagunartea eta familia » Etxeko giroa
- Familia eta harremanak » Lagunartea eta familia » Etxeko zereginak

Laburpena:

<p>7 ahizpa eta anaia bat izan dira etxean. Emakumeen etxea izan da beraiena. Etxeko zereginak egiteko, ondo moldatzen ziren.</p>

Transkripzioa

-Zazpi neska, eta zortzigarrena, mutilla.
-Oseake zazpi neska izandu zate...
-Famili hau emakumian familiya zen. Hemen bizi ginan gu bost ahizpa, ama, izeba, atzo ikusi zendun izeba, eta amona. Eta zeuden osaba Inaxio, lehen esan dizuten, armaiyu hoi in zuen mutilla, nere atta, zaharragua zen, eta nere anaiya.
-Hiru gizon...
-Bueno, nere anaiya, hortxe, umia...
-Umia... Gaztiena zan...
-Gaztiena zen ta; denetan gaztiena zen.
-Emakume asko...
-Hemen emakume asko! Eta hemen itxeko gorabeherak-eta, guk, lasai itten genittun.
-Hitzein, alegiya, zuen artian, edo nola? Etxeko gorabe... , A! Lanak! Etxeko lanak!
- Itxeko lanak!, Lanak, itxeko lanak emakumianak bakarrak ez, itxian kanpo edozer gauz ein behar zena ere, guk itten genun. Beste emakume askok itten ez zittuzten lanak itten genittun guk.
-Ya...
-Itxetik kanpo... Nunbaittea jua behar bazen zerbaitteta, edo paper bat, agiri bat atera behar bazen nunbaitte edo...
-Asko ziñaten, ta...
-Bai, ba! Eta gaiñea, bueno, guri iruitzen zitzaigun, e, ba... bueno...

2. Nortasun handiko amona, oso emakume berezia

- **Erref:** LEZ-028/003
- **Iraupena:** 0:02:24. **Hasi:** 00:06:37. **Bukatu:** 00:09:01
- **Multimedia:** bideoa online ikusgai

Gaia(k):

- Familia eta harremanak » Lagunartea eta familia » Etxeko giroa
- Iritziak » Bizitzarekiko ikuspegia

Laburpena:

<p>Amona oso feminista zuen; beretzat, ez zegoen alderik emakumeen eta gizonen artean. Senideak filosofia horretan hazi izan dira. Amona oso berezia zen, nortasun handikoa. Emakume independenteak izan dira beraiek etxean.</p>

Transkripzioa

-Gure amona ez zen... gure amona oso feminista zen. Orduan harek ez zuen feminismoik eta gaiñekoik zeatzen, biño hura izatez feminista zen. Hari ez zitzaion, gañea, gaztetik geldittu omen zen alargun, eta familiya aurea ateratzeko ta berak in beharko zittuen hainbat gauz, ez? Orduan, harek ez zuen ikusten diferentziyik gai hortan emakumian eta gizasemian artian.
-Ya, ya, ya, ya...
-Ta harrek, berak in zezakiena, zergatik ez? Eta gu hola hazi giñan. Ta guk

ez dugu sekulan kupirik izandu nonbaitte azaltzeko, edo mesede bat eskatzeko, edo edozer gauzetako.

-Oseake zuk goatzen dezu amona ausarta zala.

-Amona zen oso bereziya. Ez zen ausarta bakarra. Amona zen oso bereziya. Eta gure amonak, garai hartan ere, gu, uain bezela, pobriak giñan, ez giñan aberatsak, ta gutxiotako ere, e! Baiño gure amonak herriko jauntxuak ziela uste zutenai ere raya bat iña zion: “Zu, nere bizimoduan, hortik aurea ez”.

-Ta, goguan dezu gertaera konkretuak edo...

-Gertaera konkretuak, ba, kantidadia. Gu beti izandu gea, bueno, hala haziya giñan, oso independientiak izandu gea, hala hazi baigiñan, guri iñork ez zigun esaten nahi ta nahi ez hau in behar duzute. Zergatikan, e... guk, gañea, oso kritikua zan amona, ta hortan hazi giñan, ta guk eozeiñi esaten bageniyon “zergatik?” Zuk hala nahi duzulako edo gauzak hola dielako?”

3. Amona alkateari aurre egiteko gai

- **Erref:** LEZ-028/004
- **Iraupena:** 0:06:21. **Hasi:** 00:09:01. **Bukatu:** 00:15:22
- **Multimedia:** bideoa online ikusgai

Gaia(k):

- Baserria » Baserriko bizimodua » Baserriaren historia eta kokalekua
- Iritziak » Bizitzarekiko ikuspegia

Laburpena:

Amonak nortasun handia zuen, oso emakume berezia zen. Berari buruzko istorioa kontatzen du: beraien etxeak ez zuen jaberik, eta alkateak kobratzen zuen errenta. Behin, ordea, alkateak muturra sartu nahi izan zuen etxean, eta amonak ez zuen hori onartu. Orduan, etxearen benetako jabearen aztarna bilatzen hasi zen. Tiraka eta tiraka, azkenean lortu zuen bere helburua.

4. Etxean bizitzeko, txukun jarri zuten dena

- **Erref:** LEZ-028/006
- **Iraupena:** 0:03:20. **Hasi:** 00:15:38. **Bukatu:** 00:18:58
- **Multimedia:** bideoa online ikusgai

Gaia(k):

- Familia eta harremanak » Lagunartea eta familia » Etxearen egitura

Laburpena:

Etxea oso zaharra zen, 400 urte inguru zituen, eta lan asko ematen zuen. Bertan bizi nahi zutenez, txukundu egin zuten, eta behar zituzten azpiegiturak sortu. Etxeko askari buruz hitz egiten du; hura ez zen nahikoa familiarteko guztien arropa garbitzeko, eta osabak beste aska bat eraiki zuen.

5. Umetan, erruz jostatzen ziren

- **Erref:** LEZ-028/007
- **Iraupena:** 0:02:47. **Hasi:** 00:18:58. **Bukatu:** 00:21:45
- **Multimedia:** bideoa online ikusgai

Gaia(k):

- Familia eta harremanak » Lagunartea eta familia » Jolasak

Laburpena:

<p>Umeak ziren artean, jostatu besterik ez ziren egiten, erruz jostatzen ziren. Orduko jolasak aipatzen eta azaltzen ditu.</p>

Transkripzioa

-Ta, ze izaten zenituzten, bakoitzak zuen lanak, iteko?

-Bueno...

-Bakoitzak bere lanak izaten zitun?

-Bueno, bitu, gu umiak giñan artian, jostatu besteik ez genuen itten.

Zergatik ama, amuna, Izeba Bitoriana, gero ahizpa zaharraguak ere, bueno, ta gu, edo ni behintzat, ni eta nere ondorengo bi ahizpak, behintzat, jostatu erruz iñak gea.

-Asko jolastu dezu...

-Asko! Oso asko. Oso asko.

-Zertara jolasten ziñaten ba?

-Bueno, guk, lehenbizi, sotuan genuen "a perpetuidad", "salanburua".

-Zer?

-“Salanburua”. Ez dakizu “salanburua” zer den? Kolunpio.

-A... Ba ez nun sekula entzun...

-Ba biga batei, zeatik, zintzilik, beti, beti, han egoten zena. Osabak iña hura ere, jostatzeko. Egualdi txarretan, ba han. Egualdi onetan, honea, kanpoa atera, eta baratz inguru hontan, ba itten genuen denda, eta itten genittuen itxia, ta eskola, ta denak. Eta gero, hemen atzeko sala haundi hontan, atzeko sala hau, uain terraza dena, hau guztiya atzeko sala zen, gehiena behintzat, eta hor, gero itxe hau amonan itxia zen. Eta nere lehengusuak-eta, asko, beti hemen sartuak ibiltzen zien.

-Etorriko zien...

-Bai, asko, beti hemen. Eta orduan, egualdi txarra zenian-ta, hola, zer, eguarritako oporretan, ta [abar], hor ibiltzen giñan eskolaketan-ta, bat maistra ta bestiak eskolan, ta bestiak... Ta bai. Gero kalia, berriz, ba bai, txingoketan ta, sokasaltuan ta, “kaiokakin” ta, kromuakin ta, hoietan. Gure [...] edo jostaketak hoiek zien.

-Bai, bai, bai...

-Ta itxian katillo polit bat hausteko zai, gero jostatzen ibiltzeko, katillo bat izateko, katillo polit bat izateko. Ez zen jostailluik gure garaian. Oso gutxi.

-Baiña jolastu iten ziñaten...

-Jolastu? Jesus! Oso asko! Asko! Asko! Asko!

6. Umetan, paduran bainuan, arrantzan eta jaten

- **Erref:** LEZ-028/009
- **Iraupena:** 0:01:21. **Hasi:** 00:23:19. **Bukatu:** 00:24:40
- **Multimedia:** bideoa online ikusgai

Gaia(k):

- Familia eta harremanak » Lagunartea eta familia » Bainuak, errekek eta uretako jolasak
- Familia eta harremanak » Lagunartea eta familia » Umetako kontuak

Laburpena:

<p>Lehen, kaian, arrantzan eta igerian aritzen ziren. Lehen, itsasoa

barrenago sartzen zen, eta padurak zeuden. Hor, izkirak eta karramarroak egoten ziren, eta haiek harrapatzen aritzen ziren beraiek; gero, baina, ez zieten uzten etxera eramaten, zikinkeriak zirelakoan. Horregatik, kaian sua egin, egosi eta jan egiten zituzten.</p>

Transkripzioa

-Kai inguru hoi ta, klaro, itsasua sartzen zen, marea goian, jeitsi're bai, eta hor, arrantzan edo gauzak hartzen-ta ibiltzen ziñatela...
-Bueno, hor... ta igeri, eta dena... Oain, oain portua ta bere zea hoiek, dien hoiek denak, itsasua barrenago sartzen zen, eta gero gaiñea, gero zien marismak, entenditzen? Eta hor izkirak asko izaten zien, eta karramarruak'e bai, eta oiñetakuak erantzi ta putzuan sartu ta hor ibiltzen giñan, ba harriyak altxa ta karramarruak'o ateratzen bazen hura harrapatzen ta, hola ibiltzen giñan. Gero etxietan ez ziguten uzten.
-Zer?
-Eramaten etxea. Hoiek, zikinkeri hoiek!
-A, bai, e?
-Eta bueno, goxuak zien jateko eta bazien [gustatzen...] ta askotan, ba kaian bertan eitten genuen sua ta egosten genittuen. Ura bazen, kaian, itturri bat bazen, eta bertako itturritik ura hartu ta egosten ta aitzen... bueno, pikardiyan, bakizu, bueno...
-Baño egosi ta gero jan?
-Jan! Hoixe!
-A bai?
-Bertan harrapatuak, oso onak. Bai, ez dakit nundik ekarriyak biño hobiak izaten zien, e!

7. Amonak itotzeari zion beldurra

- **Erref:** LEZ-028/010
- **Iraupena:** 0:01:06. **Hasi:** 00:24:40. **Bukatu:** 00:25:46
- **Multimedia:** bideoa online ikusgai

Gaia(k):

- Familia eta harremanak » Lagunartea eta familia » Etxeko giroa
- Familia eta harremanak » Lagunartea eta familia » Bainuak, errekek eta uretako jolasak

Laburpena:

<p>Ez zuen ikasi igerian egiten. Amona oso beldurtia zen, eta beraiei ez zien uzten uretan ibiltzen, ito egingo ziren beldurragatik.</p>

Transkripzioa

-Ta zuk igeri ikasi zenun?
-Ez.
-Baiño baiñatu bai. Uretan sartu?
-Bai, uretan sartuta ibilli bai, biñon gure amona oso [bildurgatiya] zen. Eta konturatzen zenian hemen ingurutik falta giñala ta, ba hor izango [...] putzuan, han juaten zen. Ta benga.
-Atearazi...
-Aterarazten. Ta ez genuen ikasi igerin. Eta orduan, neskak, gutxik ikasiko zuten igeri. Hainbeste gauz zien pekatu... Ta mutillak, berriz, ba denak hor aitzen zien igerin.
-Baño amona ez zen juten pekatua zelako...

-Ez, ez, ez! Gu ittoko giñan bildurrakin [gehiyo]. Amonantzat, amonantzako pekatuak beste gauz batzuek zien.
-Ya, ya...
-Eta, ez, ittoko giñan bildurrakin. U! Euntalako bildurra izaten zuen.

8. "Acha"ren zerrategiekin, akabo padurak

- **Erref:** LEZ-028/011
- **Iraupena:** 0:02:06. **Hasi:** 00:25:46. **Bukatu:** 00:27:52
- **Multimedia:** bideoa online ikusgai

Gaia(k):

- Herria, azpiegitura » Herri-antolaketa » Aldaketak eta arazoak
- Familia eta harremanak » Lagunartea eta familia » Bainuak, errekek eta uretako jolasak

Laburpena:

<p>Joxepatxo neska koskorra zela, Achak zerrategiak jarri zituen portuan. Horren erruz, padurak lehorte egin ziren; eta, orduan, akabo bainuak, izkirak, eta umetako aisialdiko leku hori. Dena aldatu zen.</p>

Transkripzioa

Gero, ya ni neska koskorra nintzala, sartu zen Acha. Eta bueno, hor, zergatik hor zien pabelloi batzuek eta noizpaitte, zerbaitte baraderon bat-edo, itteko asmuakin-edo, izandua-edo... Eta gerra zela medio, geldittua. Eta gero gu, ni neska koskorra nitzala, etorri zen Acha, horrea, eta jarri zittuen aserraderuak, aserradero inportante batzuek. Orduan hura ein zen herri guztiyan jaun ta jabe. Eta Gineatik ekartzen zittuzten tronkuak, eta hor, putzuan sartzen zittuzten. Marisma den-denak lehortuarazi zittuzten nola edo hala, berak jakingo dute nola, eta serratu-aldian tabloiak hor, marisma hoietan denetan plegatuta ondo jarriyak, kastillo batzuk bezela jartzen zittuzten. Orduan, ya, guri akabo jostaketak, eta akabo kiskillak eta denak. Ya ez genuen han ibiltzeik izandu.

-Klaro, hura zikindu ingo zan...

-Eta gañea, ez, ez!, gañea itxi in zuten dena. Inguru guziya itxi in zuten, ta utzi zittuzten hor lau arbol, zea, ta gañeko denak beak, beren gustoa, dena itxi in zuten ta bidia-ta utzi zittuzten, e, biñon, biñon, ya... akabo.

-Hondatu in zen...

-Dena aldatu zen. Dena aldatu zen. Dena, gañea.

-Bueno...

-Eta, gañekuan, gu hemen, atzeko aldian-ta ibiltzen giñan jostatzen. Bai, leku asko genuen jostatzeko.

9. Osabaren esku baliotsuak

- **Erref:** LEZ-028/014
- **Iraupena:** 0:01:11. **Hasi:** 00:30:46. **Bukatu:** 00:31:57
- **Multimedia:** bideoa online ikusgai

Gaia(k):

Laburpena:

<p>Osaba argiketaria zen izatez, baina egurra oso ondo lantzen zuen. Horrez gain, Erreterriako paper-fabrikan egiten zuen lan. Jubilatu zenean ere, gauza asko egiten jarraitu zuen. Osabaren tailerra nolakoa zen azaltzen du.</p>

Transkripzioa

-Eta, osaba, arotza zen...?
-Osaba elektrizista zen, izatez. Biñon... biñon egurra oso ondo lantzen zuen. Oso ondo. Ikusi duzu, hemen, nola...
-Bai, bai. Oseake egurrezko lanak iten zitun.
-Itten zittun. Biño lana eitten zuen, e! Papeleran lana eitten zuen, Errenteian papeleran lana eitten zuen.
Ta gero berak aparte iten zittun, bere denbora librian edo...
-Eta gero, jubilatu ondoren-ta, gauza asko ein zittuen. Gauza asko.
-(Gustatu eingo zitzaion...)
-Kutxa txiki hoiek denak-eta, gero ein zittuen.
-Ta zeukan bihian bere tailerra...?
-Bere taillerra...
-Garai batian sagardotegiya zen tokiyan edo...?
-Ez! Ez, ez, biño, ez, bitan zeon sotua, ya bere tapiakin ta dena, esan nahi nuke, bere zeakin...
-Paretakin...
-Paretakin ta dena. Eta zen zera ttiki bat, berak taillerra bezela ibiltzen zuena, eta gañekua, dena zabal-zabal, ba, zen sagardotegiya.

10. Norbere kabuz moldatzen ikasi zuten familian

- **Erref:** LEZ-028/016
- **Iraupena:** 0:01:17. **Hasi:** 00:32:35. **Bukatu:** 00:33:52
- **Multimedia:** bideoa online ikusgai

Gaia(k):

- Familia eta harremanak » Lagunartea eta familia » Etxeko giroa

Laburpena:

<p>Aitak Kaputxinoetan egiten zuen lan, "Real Compañía Asturiana de Minas"en. Ama oso langilea zen: tenporada zenean, Pisbera joaten zen lanera; beti bilatzen zuen lana, han eta hemen. Beraien familiaren ereduia ikusita, norbere kabuz moldatzen ohitu ziren.</p>

Transkripzioa

-Attak nun iten zun lana?
-Kaputxinotan. En la Compañía Asturiana de Minas.
-Han egiten zuen...
-Bai.
-Eta amak etxian esan dezunez, ez?
-Bueno, amak edozein lekutan, ama oso langillia zen. Oso langillia zen, ta ama "Pisbe" a juaten zen lanea, tenporada zenian, eta nola amona ere itxian zen, ta zien Egaña eta Bar Villanueva, eta nere ama juaten zen, atta baratzara juaten bazen, bera ere bai; atta mendira egurreta juaten bazen, bera ere bai. Eta beti billatzen zuen lana. Itxian ere, itxian ere, jakina, itxe zaharra zen, haundiya zen, txukuna euki bihar zen ta itxia txuritu bihar bazen, amak igual txuritzen zuen. Horregatik esaten dizut, gu ohituak giñan gauza asko geok itten.

-Bai, bai, bai...
-Itxea pintatu bihar da, ba pintatu ein bihar da, ala! Denak. Entenditzen?
-Bai, bai, bai...
-Sukaldia txuritu bihar da, ba sukaldia, denak zatarra jarri buruan ta ala!

11. Amonak garrantzi handia ematen zion eskolar

- **Erref:** LEZ-028/017
- **Iraupena:** 0:00:45. **Hasi:** 00:33:52. **Bukatu:** 00:34:37
- **Multimedia:** bideoa online ikusgai

Gaia(k):

- Iritziak » Bizitzarekiko ikuspegia
- Ohiturak eta bizimodua » Hezkuntza

Laburpena:

14 urte zituen arte izan zuen eskolara joateko aukera. Garai hartan, ume asko ziren eskolara joan ezin izaten zutenak. Beraiek, ordea, beste ezereen gainetik, eskolara joan behar izaten zuten, hala agintzen baitzuen amonak.

12. Bi maistra, ikasteko bi modu

- **Erref:** LEZ-028/020
- **Iraupena:** 0:01:33. **Hasi:** 00:37:13. **Bukatu:** 00:38:46
- **Multimedia:** bideoa online ikusgai

Gaia(k):

- Ohiturak eta bizimodua » Hezkuntza » Maisu-maistrak

Laburpena:

Izandako maistrei buruz hitz egiten du. Maistra haietako bati, eskuinekoa izan arren, eskolan ez zitzaion nabaritzen. Beste maistra bat oso zaharra zen, eta haren bizitzari buruz hitz egiten du. Ezin izan zuten askorik ikasi harekin.

13. Oiartzun ibaiaren gaineko zubiari buruzko bertsoak

- **Erref:** LEZ-028/026
- **Iraupena:** 0:03:17. **Hasi:** 00:46:48. **Bukatu:** 00:50:05
- **Multimedia:** bideoa online ikusgai

Gaia(k):

- Ohiturak eta bizimodua » Kantak » Bertsoak
- Ohiturak eta bizimodua » Kontakizunak eta sinesmenak » Kultur transmisioa

Laburpena:

Etxean asko abesten zuten. Aitak bertso asko zekizkien. Erreterian, bertsolari ugari egon izan da. Oiartzun ibaiaren gainetik pasatzen den zubia egin zuteneko bertsoak abesten ditu.

14. Etxean, abesteko ohitura handia

- **Erref:** LEZ-028/028
- **Iraupena:** 0:01:02. **Hasi:** 00:51:10. **Bukatu:** 00:52:12

- **Multimedia:** bideoa online ikusgai

Gaia(k):

- Familia eta harremanak » Lagunartea eta familia » Etxeko giroa
- Ohiturak eta bizimodua » Kontakizunak eta sinesmenak » Kultur transmisioa

Laburpena:

Etxean kanta eta bertso asko abesten zituzten. Amonak arropa konpontzen zuen bitartean, abestu egiten zuen.

15. Osabak gauza interesgarriak gordetzeko ohitura zuen

- **Erref:** LEZ-028/029
- **Iraupena:** 0:01:48. **Hasi:** 00:52:12. **Bukatu:** 00:54:00
- **Multimedia:** bideoa online ikusgai

Gaia(k):

- Familia eta harremanak » Lagunartea eta familia » Etxeko giroa

Laburpena:

<p>Lehen, bertsopaperak egoten ziren, eta etxean edukitzen zituzten. Osabari gauza interesgarriak jasotzea gustatzen zitzaion; eta etxekoek errespetu handia zioten osabaren armairuari. Hura hil zenean, paper baliotsuak zituela konturatu ziren.</p>

16. Jan ala ez, hori da galdera

- **Erref:** LEZ-028/030
- **Iraupena:** 0:00:39. **Hasi:** 00:54:00. **Bukatu:** 00:54:39
- **Multimedia:** bideoa online ikusgai

Gaia(k):

- Politika » Gerraostea eta Francoren diktadura » Ekonomia gerraostean

Laburpena:

Gerra osteko gosea ezagutu zuen Joxepatxok. Amonaren esanak gogoan ditu; ez zen segurua izaten hurrengo egunean jatekorik izango ote zuten.

17. Sukaldaritza modernoa? Garai batean, betiko janaria bizitzeko modu bakarra

- **Erref:** LEZ-028/031
- **Iraupena:** 0:02:30. **Hasi:** 00:54:39. **Bukatu:** 00:57:09
- **Multimedia:** bideoa online ikusgai

Gaia(k):

- Politika » Gerraostea eta Francoren diktadura » Ekonomia gerraostean
- Ohiturak eta bizimodua » Elikadura » Jatekoa eta edatekoa

Laburpena:

Aitak "Compañía Real Asturiana de Minas"en egiten zuen lan; eta, horregatik, hainbat abantaila izaten zituzten. Etxean, gosea pasa zuten, baina ez hainbeste. Garai hartan, zer jaten zuten aipatzen du: arrain asko zegoen, baina hura prestatzeko oliorik ez. Gaur egungo sukaldaritza modernoa

dagoeneko egiten zuten Joxepatxoren aurrekoek, lehengai falta baitzen garai hartan.

18. Etxean, umorea ez zen falta

- **Erref:** LEZ-028/032
- **Iraupena:** 0:01:22. **Hasi:** 00:57:09. **Bukatu:** 00:58:31
- **Multimedia:** bideoa online ikusgai

Gaia(k):

- Politika » Gerraostea eta Francoren diktadura » Ekonomia gerraostean
- Familia eta harremanak » Lagunartea eta familia » Etxeko giroa

Laburpena:

Izebaren anekdota kontatzen du. Etxean barre asko egiten zuten.

Ahotsak.eus-eko edukiarekin sortutako dokumentu automatikoa.

2026-07-02

CC-by-sa | Ahotsak.eus

Badihardugu Euskara Elkartea

Markeskua Jauregia, 20600 Eibar

943121775 - ahotsak@ahotsak.com